



QUÆSTIO MEDICA,

QUODLIBETARIIS DISPUTATIONIBUS,
manè discutienda, in Scholis Medicorum,
die Veneris decimâ Junii.

M. PETRO PAULO GUYART, Doctore
Medico, Præsîde.

An sanguis aëris admixtione fiat sanguis?

I.



ULMO præcipuum est respirationis organum, non unicum. Ad opus tam eximium, tam necessarium, conspirant totum pectus, diaphragma: imo, & cum necesse est, ipsum abdomen. Thoracis partes tam multæ cum ad respirationem conferant, omnium maximè musculi: hi pectus ampliantes pulmonem etiam ampliant: pulmo factus amplior aërem largo haurit haustu, multum sanguinem admittit quem induit purpura. Dubitas talem esse

illius usum? vel nudis lustra oculis tracheæ furculos, arteriæ venæque pulmonaris ramos. Triplicem hancce vasorum familiam deprehendes per viscus princeps ubique sparsam, sui ubique comitem. Ex hac tubulorum dispositione colligere licet quis sit usus pulmonis, quis inspirati aëris. Chylus vitali succo materiam suppeditat. Aër formam conciliat, puta motum, colorem.

II.

SANGUIS, liquor, si quis alius, multiplex. Proindeque ad fermentescendum aptus. Opus est non unius cordis & pulmonis, sed omnium viscerum, pene dicam partium. Quæ enim pars huic, vel elaborando, vel repurgando non inferuit? In renibus serum, in jecore bilem deponit. In liene, pancreate, glandulis, adipe &c. Subit alterationes vix notas, in corde ac pulmone conspicuas. Hæ ut manifestius intelligantur sanguificationis progressum juvat prosequi. Chylus in ventriculo inchoatus, in tenuioribus intestinis perficitur, miscela bilis & succi pancreatici: hinc vasis lacteis exceptus, & ductu thoracico ad subclavas: ab his in cavam cum sanguine ab extremis reduce: à cava in dextrum cordis sinum pergit sanguis nova chyli accessione locupletatus, è corde subruher profilit in pulmones: ab his redit purpureus, tenuior, velocior in sinistram cordis cavum. Unde tam repentina mutatio motus & coloris nisi ab aëre?

III.

COR & pulmo præcipuæ sunt sanguificationis officinæ. Utri id operis magis debeatur vix quisquam decernat. Cordi appensa hinc inde duo vasa, cum auriculis, valvulis, fibris muscularibus, cellulis, arteria & vena pulmonari, sanguinis circuitum moderantur. Pulmo viscus est rarus, molle, membranosum: à quo si varii generis vasa detraxeris, nil

aliud reperies quam congeriem vesicularum, quæ ita connectuntur aliæ aliis, ut mutuum præbeant aëri aditum, dum ad extremam quæ pulmones vestit membranam pervenerit. Trachea secatur in tres partes, infima bronchiorum nomine audit: totum tracheæ corpus non ineptè comparaveris arbori inversæ, hujus rami sunt bronchiales ductus: hi vasa sanguifera ubique comitantes aërem deferunt ad vesiculas ibi cum sanguine permiscendum. Permixtio aëris cum sanguine huic, suam formam conciliat, puta motum colorem.

I V.

AER alimentum est, quo nullum animal diù careat impunè. Vita continetur sanguinis motu. Hic ab aëre maximè pendet. Nec solum motio, sed color, fluiditas sanguinis effecta sunt aëris humores exagitantis comminuentis. Hæc qui in dubium revocat, utrumque cordis sinum inspicat. Sanguinem reperiet in dextro; coloris subrubri: in sinistro; purpurei: idem sanguis qui in dextro cordis sinu iners est & itagnat, idem à pulmonibus rediens, in sinistro actuosus est, spirituosus, ferociens. Unde optimus naturæ parens substantiam fabricatus est cordi diversam pro varietate sanguinis quem continet: venoso scilicet laxam & mollem, arterioso duram & solidiorem. Strangulato cani ac præfocationi proximo insuffletur aër sive per trachæam, sive per cavam, illico cum motu ac respiratione redditur vita moribundo.

V.

QUANTA sit aëris ad vivendum necessitas nemo nescit. Tandiu enim vivimus quandiu spiramus, tamdiu spiramus quandiu ducimus aërem. Hujus pars tenuissima sanguini per arteriam pulmonis delato admixta, partes illius minutiùs concidit ut libere & expedite per arterias in corpus

universum propellantur. unde vero repetenda est causa tam frequens nec opinata mortis? id ut constet aperi cor, in eo occurrent polyposæ concretiones, occurrent & in arteriis venisque: unde etiam syncopæ, pulsus languor, & alia torpida sanguinis ac intercepti symptomata. Hæc, si bene ponitur calculus, parit aer vel deficiens, vel sanguini minus attemperatus; ipsumque coagulans, in minoribus, imò & majoribus arteriis infarctus pariens, animal quacumque de causa aut ratione aëre defraudatum brevi perit: sanguis recens missus rubet qua parte exponitur aëri. Nigrescit aliis partibus: hæ iterum aëri subjectæ rubescunt.

Ergo sanguis aëris admixtione fit sanguis.

Domini Doctores disputaturi.

M. Ambrosius Nicolaus Chemineau.

M. Michael Sauvalle.

M. Guido Crescentius Fagon;
Primarius Christianissimæ
Regis, Medicus, & At-
chiarorum comes.

M. Joannes Gelly.

M. Joannes-Baptista-Renatus
Moreau, Professor Regius.

M. Jacobus de Bourges.

M. Joannes-Baptista-Gabriel
Fressant.

M. Renatus le Conte.

M. Nicolaus Rainsant.

Proponebat Parisiis MATHÆUS DIONYSIUS FOURNIER,
Parisiensis, Baccalaureus Medicus. A. R. S. H. 1695.

Apud Franciscum Muguet, Regis & Facultatis Medicinæ Typographum;